

PE DIGNITÂT E PAL AVIGNÎ DE LENGHE FURLANE PAI DIRITS DI DUTIS/ DUCJ

A undis agns de Leç Regionâl n.15 dal 1996 e a cuasi vot di cuant che e je stade fate buine la Leç 482 dal 1999, i timps a jerin e a son madûrs par un proviodiment di bande de Aministrazion regionâl dal Friûl Vignesie Julie che al tegni cont cun serietât dal impuartant argoment dai dirits linguistics dai citadins che a fasin part de comunitât linguistiche furlane.

Un proviodiment che al compuarti il coordinament e la razionalizazion des normis che a son in cheste materie, cul fin di rindi **cierte e efficace la tutele**, tignint cont dal detât costituzionâl e dai documents di indreçament sedi de Union Europeane sedi dal Consei de Europe. E che al consideri cun di plui il caratar de presince de comunitât di lenghe furlane tant che fonde pe stesse esistence de Regjon autonome a statût speciâl Friûl Vignesie Julie.

Magari cussì no, juste ae fin di un iter che al puartave a sperâ ben, la Zonte regionâl e à licenciât un dissen di leç che **al jentre in plene contradizion cu lis dibisugnis parsore marcadis, e ancje cu lis liniis di indreçament fatis buinis pôc timp prime e cul test consegnât de Comission di esperts**, clamâts a prontâlu.

Chest Ddl si palese a clâr **incostituzionâl** in ciertis sôs parts e **cence coerence interne**; si è intervignûts cul sisteme dal taie e incole mudant un test, chel de Comission di esperts, dât dongje in maniere coerente e meditate.

Si è cun di plui lâts indenant cul pleâsi in maniere no spietade denant di une impostazion che e cubie ignorance provinciâl, sborfade cu la tecnocrazie e l'eficientisim, e un nazionalisim talian che nol rive a concepî il pluralisim linguistic e culturâl. Altri che resoluzions dal Parlament european, altri che Cjarte europeane des Lenghis regionâls o minoritariis o Convenzion cuadri des minorancis nazionâls! Chi o sin ae solite culture de *Italieta* dal Vot-Nûfcent.

Par chel che al rivuarde la funzionalitât, no un dai problemis presints, començant di chel scolastic, a son disgredeâts cun chest test. Al contrari ae confusion si zonte confusion: te scuele, tai uficis publics, tal cjamp dai media, e v.i.. Si ignore la pussibilitât di fâ de lenghe furlane un element di inovazion, creant professionalitâts e puescj di vore cualificâts.

Il cuadri gjenerâl che si olme al è fintremai chel di **un tornâ indaûr, di un meti in discussion i elements di politiche linguistiche inviâts in chescj dîs agns**: si gjave fuarce parfin aes normis relativis al ûs de grafie uficiâl.

Dut chest **cul subordenâ in mût pesant lis sieltis di politiche linguistiche, che a compuartin une serie di cognossincis specifichis, aes variacions de politiche tout court**, parcè che l'organisim di politiche linguistiche al sarès la stesse Zonte regionâl. Cualsisei riferiment al model galês, declarât tant che ispiradôr di chest test, al pues someâ fintremai une provocazion par cui che al cognòs pardabon i risultâts grues otignûts de politiche linguistiche in Gales

Ae fin, se e je vere, come che e je vere e come che al è stât declarât dai massims esponents de Zonte, che lis lenghis furlane, slovene e gjermaniche a son la fonde de autonomie e de specialitât regionâl, **une leç metude dongje in chest mût e je un atac diret ai motîfs che a rindin plausibile la esistence dal Friûl Vignesie Julie**; sedi parcè che a 'ndi inderede la coesion sociâl, sedi parcè che e gjave arguments par contradî cui che nol viôt motivazions reâls par mantignî la sô specialitât tal cuadri des regjons talianis.

In ogni câs **vê judizi al vûl dî tornâ indaûr des decisions faladis, scancelant chest Ddl**.

Il test consegnât de Comission di esperts al è un bon test, ni visionari ni estremist; ae Zonte e a dutis lis fuarcis politicis o disin che di chest si à di tornâ a partî, par miorâlu e rindilu plui eficaç, calcolant ancje i aspjets inovatîfs contignûts tes propuestis di leç su la scuele presentadis ae VI Comission e tignint presint la sô finalitât: **la tutele e la promozion de lenghe furlane**.

Aes democratichis e ai democratics di ogni pâs e localitât, a cui che al à a cjâr, parie cun ducj i dirits, i dirits linguistics, in mût indipendent de sô marilenghe o de lenghe che al dopre, ur domandî di sotscrivi chest apel, discjamâlu di Internet, fânt copie, discutilu in public. O fasarî parie un bon servizi al pluralisim linguistic, patrimoni prezios di dute la umanitât.